

ԵԿԵՂԵՑԻՆ ՀԱՅԱՍՏԱՆԻ ՆԵՐՔԻՆ ԻՆՔՆԱԿԱՐՈՒԹՅԱՆ
ՎԵՐԱԿԱՆԳՆՄԱՆ ԺԱՄԱՆԱԿԱՇՐՋԱՆՈՒՄ
(IX դարի առաջին կես)*

ՎԱՐԴԱՆ ԱԼԵԿՍԱՆՅԱՆ

Բանալի բառեր՝ Հայոց եկեղեցի, արաբ կառավարիչներ, վանք, կրոնական խստացումներ, Բաղարատ Բագրատունի, Դավիթ Բ Կակաղեցի, Հովհաննես Դ Ովայեցի, Մովսիս Կաթողիկոս, կրոնափոխություն, ապստամբություն, Թոնդրակյան շարժում, նահատակություն:

Նախաբան

Հայերի 774–775 թթ. հակաարաբական հուժկու ապստամբության պարտությունը նոր իրողություններ առաջացրեց Հայաստանում: VIII դ. վերջին ծանր հարված ստացան երկրի ինքնավարությունը մարմնավորող երկու ինստիտուտները՝ նախարարական համակարգը և Հայոց եկեղեցին: Քաղաքական բեմը լքեցին պետականակիր նախարարական տոհմերը՝ Մամիկոնյաններն ու Կամսարականները, որոնք միևնույն ժամանակ եկեղեցու ջերմ աջակիցներն էին: Այս ծանր ժամանակաշրջանում, երբ հայ իշխանների մի մասը երկրից հեռացել էր, իսկ «մնացեալք զօղեալք դադարեալ կային ընդ լծով ծառայութեան նոցա»¹, երբ եկեղեցին կորցնում էր իր հարստություններն ու ազդեցությունը, և արտագաղթող հայերի փոխարեն երկրում բնակություն էին հաստատում մուսուլման արաբները, Հայաստանի առաջնորդության դրոշմ վերցնում են Բագրատունիները: Վերականգնված Հայոց սպարապետությունը նորից անցնում է Բագրատունիներին, որոնք, մեծացնելով իրենց ազդեցությունն Արմինիայի հայկական շրջաններում, հաստատվում են նաև Վիրքում²: Սպարապետ է դառնում 775 թ. ապստամբության ժամանակ զոհված Սմբատ Բագրատունու որդի Աշոտ Մսակերը (802–826)³, ով իր իշխանությունը հաստատել էր Հայաստանի հյուսիսարևմտյան շրջաններում՝ Տայքում, Արշարունիքում, Շիրակում և Աշոցքում: Աշոտ Մսակերը, ով հայ իշխաններից ամենաազդեցիկը, քաջն ու ժողովրդականն էր, հարվածներ է հասցնում թուլացած նախարարական տների հողերին տիրացած արաբական ցեղերին և նրանցից

* Ներկայացվել է 21. VI. 2022 թ., գրախոսվել է 23. VI. 2022 թ., ընդունվել է տպագրության 09. XI. 2022 թ.:

¹ Դր ա ս ի ա ն ա կ եր տ ց ի. 2010, 426: Ասպարեզից հեռացան ու գրեթե վերացան Ամատունի, Ռչտունի, Անձևացի, Գնունի և այլ իշխանական տներ:

² Հաւաքումն պատմութեան Վարդանայ վարդապետի. 1862, 81–82, Մ ա ր - կ ու ա ր տ. 1912, 336, 1913, 287–290, 469–470, Ա դ ո ն ց. 2006, 478–514:

³ Ю з б а ш я н. 1988, 54. Հմմտ. Ե դ ի ա զ ա ր յ ա ն. 2011, 28: Մատենադրության մեջ «Մսակեր» հորջորջման հեղինակն Ասողիկն է (Ա ս ո ղ ի կ. 2010, 707): Նա կրել է նաև «Քաջ» մականունը:

եստ գրաված կալվածքներում հավաքում է այս ու այն կողմ ցրված հայերին: Վարդան պատմիչը հիշում է նման մի դեպք՝ կապված Գնունիների հետ, որոնք մեծ նեղություններ էին կրում Աղիովիտում հաստատված արաբական Ութմանիկ ցեղից և արաբ իշխանություններից: 790-ական թվականներին նրանք խնդրում են Աշոտ Մսակերին «թափել գնոսա յիսմայելացւոցն»: Վերջինս ընդառնում է նրանց և «երթեալ հազար արամբ յԱղիովիտ գաւառ, և առ ինքն գումարեալ զամենայն ազգն ախիւն իւրեանց, տանի բնակեցուցանէ ի Տայս»⁴:

Կառուցվածքային փոփոխությունները Հայոց եկեղեցու համակարգում

IX դ. սկզբներին հետզհետե կանգ է առնում Հայաստանի անկման ընթացքը, և սկիզբ դրվում երկրի ներքին ինքնավարության վերականգնմանը: Նախարարական համակարգի հետ կառուցվածքային փոփոխությունների է ենթարկվում նաև Հայոց եկեղեցու ավատատիրական հենքը: Նախկինում IV–VIII դարերում, Հայաստանի ամեն մի եպիսկոպոսական վիճակ ուներ իր որոշակի հողային տարածությունները, որոնք կառավարվում էին գյուղական հոգևորականության կողմից: Արդեն VIII դարավերջերից ու IX դ. եպիսկոպոսական վիճակներին պատկանող և գյուղական հոգևորականությանը ենթակա հողերն աստիճանաբար անցնում են օրեցօր հզորացող վանքերին: Դեռևս վաղ միջնադարից գոյություն ունեցող վանքերի կողքին ձևավորվում են նորերը, որոնք շրջակա խոպան հողերի ու անտառային մարգագետինների մշակման ու յուրացման հաշվին մեծ չափով ընդլայնում են իրենց տարածությունները⁵: Նշված փոփոխությունները կառուցվածքային նոր տեսք են տալիս եկեղեցու տնտեսական հիմքը կազմող ավատական հողատիրությանը: IX դ. արաբ պատմիչ Բալազուրին հիշում է Սյունիքում գտնվող մի վանքի մասին, որը կոչվում էր «Բաժակների (սկիհ) վանք (Դայր ալ-Ակդահ), և Հայաստանի քրիստոնյաներն այն շատ էին մեծարում ու պարգևներ ընծայում»⁶: Գեղարքունիքում հայտնի էր Մաքենյաց վանքը, որը պատմիչը կոչում է «գմեծ մայրաքաղաքն Մաքենացւոց»⁷: Նույն ժամանակաշրջանում է հիմնադրվում և նշանակալի զարգացում ապրում միջնադարյան Հայաստանի նշանավոր հոգևոր-մշակութային կենտրոն Սևանա վանքը: Աղբակում հայտնի էին Սուրբ Խաչ ու Վարազա վանքերը⁸: Նվիրատվությունների և գնումների միջոցով տարբեր վայրերում առաջացած վանքերը ձեռք էին բերում բազմաթիվ գյուղեր, կալվածքներ ու հասութիւններ այլ հաստատություններ, որոնք դառնում էին նրանց եկամտի հիմնական աղբյուրները: Վանքերը հատուկ ուշադրություն էին դարձնում իրենց տնտեսության բարեկարգմանը, ոռոգելի էին դարձնում և մշակում անջրդի հողերը: Ուշագրավ վկայություն է պահպանվել Թալինի Մայր տաճարի ՄՂԲ (783) թվականի վիմագիր արձանագրության մեջ, որտեղ հիշատակվում է Ուխտատուր վանականի՝ ջուր բերելու (ջրանցք

⁴ Հաւաքումն պատմութեան Վարդանայ վարդապետի. 1862, 77:

⁵ Գրիգորյան. 1973, 23:

⁶ Բալազուրի. 2005, 282:

⁷ Կադանկատուցի. 1983, 327:

⁸ Արծրունի եւ Անանուն. 2010, 215, 226, 228:

անցկացնելու) մասին⁹։ Անհրաժեշտ ենթակառուցվածքներով համալրվող վանքերում կազմակերպվում էին եկեղեցական միաբանություններ, որոնք VIII–IX դդ. դառնում են հայ հոգևորական դասի ձևավորման հիմք։ Այդ շրջանից սկսած հոգևորականն այլևս չէր կարող թողնել եկեղեցական ծառայությունը՝ գինվորական ասպարեզ մտնելու համար։ Շեշտվում է նաև կուսակրոն հոգևորականության դերը¹⁰։

Խնդրո առարկա ժամանակաշրջանում Հայոց եկեղեցին, պարբերաբար ենթարկվելով իսլամի գրոհներին, միաժամանակ ենթակա է եղել հույների ճնշումներին, որոնք պարտադրում էին ընդունել Քաղկեդոնի եկեղեցական ժողովի որոշումները։ Այս երկու հոսանքներին ընդդեմ, դավանաբանական վեճերի պայմաններում VIII դ. կեսերից եկեղեցին ամրապնդում է իր տեսական հիմքերը, ստեղծում ինքնուրույն օրենսդրություն։ Հայոց եկեղեցու ծիսադավանական և աստվածաբանական սկզբունքների հստակ սահմանումը նպաստում է ազգային ու կրոնական ինքնության գիտակցման զարգացմանը։ «VIII դարից ի վեր, հայկական պաշտոնական ծիսական գրքերում, հիրավի, սկիզբ է առնում տոնական օրացույցի աչքի զարնող առաջընթացը, որն ի հայտ է բերում ազգային զգացողության կրկնապատկումը»¹¹, – գրում է Փրանսիացի հոգևորական Շառլ Ռենոն։

Արաբների կրոնական խստացումները

Ազգային օրենսդրության ստեղծման և ինքնության ամրապնդման Հայոց եկեղեցու ձեռնարկները չէին կարող չանհանգստացնել արաբ կառավարիչներին ու ճշգրտումներ չմտցնել հայերի նկատմամբ վարվող կրոնական քաղաքականության մեջ։ Եթե Օմայանների ժամանակ արաբներն ունեին «համբերատար վերաբերմունք եկեղեցու նկատմամբ»¹², ապա VIII դ. սկզբից, մասնավորապես՝ Հիշամ խալիֆի ժամանակներից (724–743), այդ քաղաքականությունը փոխվում է։ Հայ կղերական դասը ենթարկվում է հարկադրանքի, իսկ VIII դ. վերջից Հայաստանի հարուստ վանքերն ու եկեղեցիները դառնում են կողոպուտի և հարստահարման օբյեկտ։ Արաբներն առիթ էին որոնում վանքերից և նույնիսկ Դվինի հայրապետանոցից որևէ կալվածք կամ ունեցվածք խլելու։ IX դ. սկզբներից Թալանի և կողոպուտի հետ նաև խստանում է արաբների կրոնական անհանդուրժողականությունն ու առաջնային դառնում հավատափոխության գործոնը։ Նույն դարի կեսերին է վերաբերում արաբ պատմիչի խոստովանական վկայությունը Հայաստանի քրիստոնյաների կողմից մեծարված և նրանց համար ուխտատեղի դարձած Բաժակների վանքում (Դայր ալ-Ակդահ) արաբ զորավարի իրականացրած թալանի մասին. «Սա հափշտակեց ամբողջ ունեցվածքը և բռնություն գործադրեց նրա մարդկանց

⁹ Հո վ ս ե փ յ ա ն. 1913, 176:

¹⁰ Հայ ժողովրդի պատմություն. 1984, 369:

¹¹ Ռե ն ու. 2008, 88: Թե՛ վարդապետական, թե՛ ծիսական ասպարեզներում բաբենորդման այս գործընթացի նախաձեռնողներն էին եկեղեցու նշանավոր հայրեր Հովհան Օձնեցին (717–728), Արշարունյաց եպիսկոպոս Գրիգորիսը (650–730), Խոսրովիկը (VIII դ. առաջին կես), Սողոմոն Մաքենացին (VIII դ.), որոնք մշակում են Հայ եկեղեցու ինքնուրույն օրենսդրությունը, սահմանում եկեղեցական կարգը, որը գործում է առ այսօր:

¹² Մ ա ն ա ն դ յ ա ն. 1978, 581:

(վանականների) նկատմամբ»¹³: Բուղայի արշավանքների ժամանակ, ինչպես հաղորդում է Թովմա Արծրունին, արաբները հարկատու էին դարձրել Վարազա վանքի միաբաններին¹⁴ ոտնահարելով վանական-եկեղեցական կալվածքների ապահարկության իրավական նորմը:

IX դ. առաջին կեսին քրիստոնեության ու նրա հետևորդների նկատմամբ արաբների վարած քաղաքականության վրա զգալի էր օրվա տիրակալի սուբյեկտիվ վերաբերմունքը, որը բխում էր նրա աշխարհայացքային պատկերացումներից և արժեքային համակարգից: Ժողովրդական բանահյուսության մեջ բարեպաշտ թագավորի առաքինություններով օժտված Հարուն ալ Ռաշիդի (785–809) հրամանագրով քրիստոնյաները ոչ միայն զրկվում են զբաղեցրած պաշտոններից, այլև պետք է հագնեին մուսուլմաններից տարբերվող հագուստ, իսկ նրանց եկեղեցիները ենթակա էին քանդման¹⁵: Սակայն արգելքներ չկային սովորական կրոնական ծեսերի և տոների կատարման կապակցությամբ: «Հարունի ժամանակ, – գրում է բրիտանացի արաբագետ Ա. Թրիթտոնը, – ընդունված պատկերացումն այն էր, որ քրիստոնյաների որոշ կրոնական արարողություններ իրականացնելու իրավունքը այնքան հնուց է գալիս, որ անպատեհ է դրան հակադրվելը, որքան էլ որ մեծ լինի մուսուլմանների դժգոհությունը»¹⁶: Հարունի հաջորդ Մամուն խալիֆը (813–833)¹⁷ համեմատաբար բարեհաճ մոտեցում ուներ քրիստոնյաների նկատմամբ, սակայն եզրափակում քրիստոնյա զպտիների ընդլայնումներից հետո նրա վերաբերմունքը փոխվում է:

Կրոնական խտնացումները բարձրակետին են հասնում Մութավաքիլ խալիֆի օրոք (847–861), ով «մարմնացնում էր ամենամուսուլմանական առաքյալությունը դեմ»¹⁸: Նրա կառավարման սկզբնական, բայց շատ կարճ շրջանում քրիստոնյաների վիճակը մասնակիորեն բարելավվում է. վերջիններիս կրկին թույլատրվում է զբաղեցնել պետական պաշտոններ: Սակայն դրությունը շատ արագ փոխվում է, և խալիֆը 849 թ. վերացնում է քրիստոնյաներին պաշտոնների նշանակելու թույլտվությունը: Նրա հրամանով քանդվում են բոլոր նորակառույց եկեղեցիները, իսկ նորերի կառուցման վրա՝ արգելք դրվում¹⁹: Զիմմինների²⁰ համար նա սահմանում է տարբերվող հագուստ.

¹³ Բ ա լ ա գ ու լ ի. 2005, 282: Արաբագետ Ա. Տեր-Ղևոնդյանի կարծիքով 851 թ. արաբների դեմ հայերի ընդվզման պատճառը հենց այս վանքի կողոպտումն էր Ալա գորավարի ձեռքով (Тер-Гевондьян. 1977, 142):

¹⁴ Ա Ր Ժ Ր Ո Ւ Ն Ի Ե Ւ Ա Ն Ա Ն Ո Ւ Ն. 2010, 215, 226, 228:

¹⁵ Гиргас. 1865, 71.

¹⁶ Tritton. 1970, 114. Լինում էին դեպքեր, երբ քրիստոնյաների կրոնական տոնակատարություններին մեծ բազմություն էր միանում (Tritton. 1970, 114):

¹⁷ Աբուլ-Աբաս Աբդալլահ ալ-Մամունը Հարուն ալ-Ռաշիդի որդին է, հայտնի է որպես գիտությունների հովանավոր: Քրիստոնյաներին ազատեց մի շարք պարտականություններից (Tritton. 1970, 170, 218):

¹⁸ Լ ե ո. 1967, 428:

¹⁹ Յ ա կ ու լ ի. 2005, 392–393, Гиргас. 1865, 71.

²⁰ Իսլամական իրավունքը խալիֆայության հպատակներին բաժանում էր երեք խմբի՝ մահմեդականներ, զիմմիններ (հովանավորյալ) և ստրուկներ (Гиргас. 1865, 25): Զիմմինները նրանք են, որոնք օգտվում են Զիմմայից, իսկ Զիմման անվերջ նորոգվող պայմանագիր է, որի միջոցով մուսուլմանական համայնքն ա-

պետք է հագնեին դեղին վերնագգեստ և չկրեին սպիտակ հագուստ²¹։ Գլխահարկը կրկնապատկվում է, արգելվում է քրիստոնյաների մուտքը մուսուլմանական բաղնիք։ Իր կառավարման ամբողջ ընթացքում Մուլթավաքքիլը շարունակաբար մեծացնում էր ճնշումները քրիստոնյաների նկատմամբ. արգելվում էր ձի հեծնել, նրանք կարող էին օգտվել միայն ավանակից կամ ջորուց։ Նրանց տների վրա ամրացվում էին սատանայի պատկերով փայտե տախտակներ, իսկ գերեզմանները պղծում էին՝ հավասարեցնելով հողին²²։ Խալիֆի հրամանով նաև արգելվում էին երթերի ժամանակ խաչեր կրելը և փողոցում ժամերգություն կատարելը²³։ «Օմար II-ը և Մուլթավաքքիլը փորձում էին ճնշել քրիստոնեության նույնիսկ ամենասովորական դրսևորումները, բայց չեն հաջողում»²⁴, – գրում է Ա. Թրիթոնը։

Հայոց եկեղեցու առջև ծառացած մարտահրավերները Դավիթ Բ Կադեցու օրոք

Հովսեփ Բ Փարպեցուց հետո՝ 806 թ., կաթողիկոս է ընտրվում Դավիթ Բ Կակադեցին։ Նա Մազազ գավառի Կակազ գյուղից էր²⁵։ Դավիթ Բ-ի երկարատև աթոռակալության վերաբերյալ տեղեկությունները հափազանց սուղ են, մինչդեռ նա պաշտոնավարել է Հայոց եկեղեցու նկատմամբ արաբների գործադրած սաստիկ ճնշումների և բռնությունների ժամանակաշրջանում։ Կարծում ենք, որ տեղեկությունների բացակայությունն արդյունք է եկեղեցու իրավասությունների հական սահմանափակման և կաթողիկոսական ինստիտուտի ինքնուրույնության նվազման։ Հայոց հոգևոր կառույցի նկատմամբ արաբների գործադրած ճնշումները հասկանալիորեն սահմանափակում էին հայ եկեղեցականների նախաձեռնությունները՝ վերջիններիս մղելով լոկ կրավորական գործունեության։ Այդուհանդերձ, պահպանված կցկտուր տեղեկությունները վկայում են, որ այդ շրջանում Հայաստանում տեղի են ունեցել եկեղեցական-կրոնական խմորումներ։ IX դ. առաջին քառորդին՝ Աշոտ Մսակերի ժամանակ (802–826), Հայաստան է եկել ասորի միաբնակ եկեղեցու հեղինակավոր պաշտոնյա, գիտնական Նանա սարկավազը։ 812–813 թթ. Աշոտ Մսակերը պատվիրել է նրան գրել Հովհաննու Ավետարանի համառոտ մեկնությունը։ 813–816 թթ. Նանան արաբերենով գրել է Ավետարանի մեկնությունը և ընծայել Աշոտի որդի Բագարատ Բագրատունուն²⁶։ Հայաստանում սարկավազը պայքար է տարել քաղկեդոնական Եպիկուրոս անունով հույն եպիսկոպոսի դեմ, որը փորձում էր Հայոց իշխան Աշոտ Մսակերին դարձնել քաղկեդոնական

պահովում է հյուրընկալություն և պաշտպանվածություն այլ կրոնների հետևորդների համար, որոնք ընդունել են իսլամի գերիշխանությունը (Աբու Յուսուֆ. 2005, 118, ծանոթ. 13, Tritton. 1970, 50)։

²¹ Гипрац. 1865, 71.

²² Гипрац. 1865, 71; Tritton. 1970, 107.

²³ Tritton. 1970, 107.

²⁴ Tritton. 1970, 114.

²⁵ Հայր Ալիշանը Կակազը կասկածանքով նույնացնում է հետագայի Քյոթուզ գյուղին։ Հիշատակվում է Ակադից, Ակողից, Ակաւից ձևերով (Ալիշան. 1890, 371)։

²⁶ Ակիշան. 1922, 131–132։

եկեղեցու հետևորդ: Նանան հակաճառություն է սկսում Եպիկուրոսի դեմ և հերքում վերջինիս աստվածաբանական տեսությունները²⁷: Ասորի միաբնակ եկեղեցու հեղինակավոր պաշտոնյա Նանայի՝ Հայաստան ժամանման փաստը վկայում է լուրջ առաքելության մասին: Ենթադրվում է, որ փորձ էր կատարվում ստեղծել հայ և սիրիական եկեղեցիների միություն, ձևավորել ընդհանուր «ուսգմաճակատ» քաղկեդոնականության դեմ:

Դավիթ Բ-ի օրոք Հայաստանի ինքնավարության վերականգնման ոչ դյուրին ընթացքն ուղեկցվում է խալիֆայական իշխանության գերակայությունը չճանաչող տեղական կառավարիչների ապստամբություններով, որոնք մեծ ավերածություններ էին պատճառում Հայաստանին: Սևադա անունով մի պարսիկ իշխան, «ի տանէ Զահապայ»²⁸, ընդվզում է խալիֆայության դեմ՝ փորձելով հաստատել սեփական անկախ իշխանությունը և դրանում ներառել նաև Հայաստանի հյուսիսային գավառները: Նա ամուսնացած էր Բագրատունյաց Արուսյակ իշխանադստեր հետ և փորձում էր իրավունքներ իրացնել հայկական հողերի նկատմամբ: Հովհաննես Դրասխանակերտցու հավաստմամբ, կնոջ անունով «գյուղով մասն երկրիս բռնակալեալ սեպհականաբար իմն տիրէր»²⁹: Մարտնչելով արաբական տիրապետության դեմ՝ Սևադան հանդես էր գալիս որպես հայերի պաշտպան: Նա գործողություններ է ձեռնարկում Իսա իբն Խալիդ անունով³⁰ նոր նշանակված ոստիկանի դեմ: Աշոտ Մսակերի գլխավորությամբ հայ նախարարների մի մասը պայքար է սկսում Սևադայի դեմ և խափանում որոշ հայկական կալվածքների զավթումը: Խալիֆը, ի նշան շնորհակալության, Սամաուայում պատանդության մեջ պահվող Աշոտի որդի Սմբատին վերադարձնում է հորը³¹: Մ. Օրմանյանի հաշվարկներով այս դեպքերը տեղի են ունեցել 822 թ.՝ Մամուն ամիրապետի օրոք³²: Սակայն Սևադային հաջողվում է իր կողմը գրավել մի քանի նշանավոր հայ ազնվականների, «ընդ որս էր եւ մեծ սպարապետն Հայոց Սմբատ, եւ Սիւնեաց տէր եւ այլ եւս ազատագրունդ տեսրք»³³: Հայաստանում արաբական իշխանություններին սպառնացող վտանգները չեզոքացնելու համար Խալիդը դիմում է տարբեր միջոցների՝ ընդհուպ խոստանալով Սևադային Հայաստանի կառավարչի

²⁷ Հաւաքումն պատմութեան Վարդանայ վարդապետի. 1862, 78:

²⁸ Մանագլերտի կայսիկ էմիր Զահապն ամուսնացած էր Մուշեղ Մամիկոնյանի դստեր հետ: Նա հանդես էր գալիս որպես Մամիկոնյանների ունեցվածքի, այսպես ասած, օրինական ժառանգորդ և կռիվ սկսեց Բագրատունիների դեմ (Հաւաքումն պատմութեան Վարդանայ վարդապետի. 1862, 78):

²⁹ Դ ր ա ս ի ա ն ա կ ե Ր տ ց ի. 2010, 427:

³⁰ Հայկական սկզբնաղբյուրներում Իսա իբն Խալիդ ոստիկանը հիշվում է Հոլ անունով: Արաբական մատենագրության մեջ նման անուն չի նշվում: Սա Իսա իբն Մուհամմադ Աբի Խալիդն է (820–823), որը Հայաստանում հաղթել է Սևադա Զահահաֆին (Ֆ ա ս մ է Ր. 1929, 656, Տ ե Ր-Ղ և ո ն դ յ ա ն. 1977, 125): Հ. Նալբանդյանը կարծում է, որ «Հոլ» անունը Խալիդը ստացել է Հայաստանում գործած դաժանությունների պատճառով, որովհետև արաբերեն «հալ» նշանակում է սարսափ (Ն ա լ բ ա ն դ յ ա ն. 1956, 118):

³¹ Ա ս ո ղ ի կ. 2010, 707:

³² Օ Ր մ ա ն ե ա ն. 2001, 1074, §634:

³³ Դ ր ա ս ի ա ն ա կ ե Ր տ ց ի. 2010, 427:

պաշտոնը³⁴: Միաժամանակ ինչպես փորձում էր խաթարել հայ նախարարների և պարսիկների միջև ձևավորված համաձայնությունն ու Սևադային ապարեզից հանել հայերի ձեռքով: Նա Դավիթ կաթողիկոսին որպես բանազնաց ուղարկում է Սմբատի և Սահակի մոտ՝ համոզելու նրանց ետ կանգնել Սևադայի հետ գործակցելու մտքից: Դավիթ կաթողիկոսը հանդիպում է Սևադային ու փոխանցում ոստիկանի խոսքը. «Ընդէ՞ր եւ կամ վասն է՞ր իմիք այդպէս զաւաքադուլեամբ իմիք հպարտացեալ խրոխտայք դաւել զիս. թէ ոչ զիս, ապէ, կամիք ընդունել, վայրացդ ելիցդ իմ տեղի տու՛ք ի բաց գնալով, զի ի ձենջ աներկիւղաբար չու արարեալ, երթալ գնացից»³⁵: Սակայն կաթողիկոսի ջանքերը՝ համոզելն ու աղաչանքները, արդյունք չեն տալիս. Սևադայի և հայ նախարարների դիրքորոշումը չի փոխվում, իսկ հայրապետը «յաւետ տրտմեալ» վերադառնում է: Հարցը խաղաղ ճանապարհով լուծելու բոլոր հնարավորությունները սպառելուց հետո ինչպե՞ս, «ի պատրաստութիւն զինուց իբրեւ երկու հազար», գորքով շարժվում է նրանց դեմ և ճակատամարտ տալիս Հրազդանի հովտում գտնվող Կավակերտ գյուղի մոտ: Այդտեղ ընկնում է Սահակ Սյունին, իսկ Սևադան և Սմբատը «հազիւ ճողոպրեալք անձնապուրծ փախչէին»³⁶: Զախճախելով հակառակորդին՝ ինչպե՞ս դադարեցնում է պատերազմը և վերջ տալիս վրեժխնդրությանը: Նա նույնիսկ թույլ է տալիս պատվով հողին հանձնել Սահակ Սյունու մարմինը: Այդ մասին վկայություն է փոխանցում Սյունյաց պատմիչը. «Իսկ երանելի հայրապետն Դավիթ լուեալ՝ անհնարին ողբովք հեծեծէր. և ընթացեալ բազմամբոխ պաշտօնէիւք կազմէր զդադաղն արքայակերպ և բարձեալ զմարմինն մեծահանդէս պաշտամամբք, սաղմոսիւք և օրհնութեամբ բերեալ ի կաթողիկոսարանն ի Դուին՝ դնէ ի քնարանի մերձ ի սուրբ քաւարան կաթողիկոսարանին»³⁷: Արաք հեռատես պաշտոնյան մեծահոգաբար Սմբատին չի գրկում տիրույթներից և իշխանական պատիվներից: Ոստիկանի այս մեղմ վերաբերմունքի պատճառը, ըստ Մ. Օրմանյանի, Դավիթ կաթողիկոսի միջնորդությունն էր³⁸: 833 թ. 27 տարի պաշտոնավարելուց հետո, «լցեալ հայրապետին գկէտ կենաց իւրոց՝ վախճանի»³⁹:

³⁴ Ա դ ո ն ց. 2006, 452:

³⁵ Դ ր ա ս խ ա ն ա կ ե ր տ ց ի. 2010, 427–428:

³⁶ Կավակերտի ճակատամարտը, հավանաբար, տեղի է ունեցել 829–832 թվականներին՝ ինչպես երկրորդ պաշտոնավարման շրջանում (Ն ա լ բ ա ն դ յ ա ն. 1956, 119, Тер-Гевондян. 1977, 135): Պատմաբան Ա. Եղիազարյանը ենթադրում է, որ Սևադան ապստամբել է երկու անգամ՝ առաջինը՝ 820–823 թթ., իսկ երկրորդը՝ 829–832 թթ. (Ե դ ի ա զ ա ր յ ա ն. 2010, 163):

³⁷ Ստեփաննոսի Սիւնեաց եպիսկոպոսի Պատմութիւն տանն Սիսական. 1861, 122, Դ ր ա ս խ ա ն ա կ ե ր տ ց ի. 2010, 428:

³⁸ Օ ր մ ա ն ե ա ն. 2001, 1076, §635:

³⁹ Դ ր ա ս խ ա ն ա կ ե ր տ ց ի. 2010, 428: Ասողիկի երկում Դավիթ Կակաղեցու պաշտոնավարման տևողությունը նշված է ԻԵ (25) տարի ԻԵ-ի (27) փոխարեն (Ա ս ո ղ ի կ. 2010, 706): Ենթադրելի է, որ սա Ե և է տառերի ձեռագրական շփոթի հետևանք է: Դավիթ Կակաղեցու երկարատև պաշտոնավարության ժամկետը՝ 806–833 թթ., մեծ մասամբ համընկնում է Մամուն խալիֆի գահակալության տարիներին (810–833):

Դավիթ Կակաղեցու աթոռակալության ժամանակաշրջանին վերաբերող ուշագրավ մի վկայություն է պահպանվել XIII դ. ժամանակագիր Մխիթար Այրիվանեցու երկում: Այն որոշակի լույս է ափոտում թոնդրական աղանդի ձևով եկեղեցու դեմ ուղղված շարժման սկզբնավորման խնդրահարույց փուլի վրա և վկայում Դավիթ Կակաղեցու օրոք առկա մարտահրավերների մասին: 821 թ. ներքո Այրիվանեցին արձանագրում է. «Սմբատ Աբլաբասայ. սա է նախնին թոնդրակեցոց աղանդին»⁴⁰: Ստեփանոս Սյունեցու վկայաբանության մեջ, որի հեղինակը դարձյալ Այրիվանեցին է, կարդում ենք. 822 թվականին «Սուրբն Ստեփանոս կայր ի կաթողիկոսարանին և լուսաւորէր զամենեանս բանիւ վարդապետութեան իւրոյ. հանդիպեցաւ նմա հակաճառութիւն ընդդէմ Սմբատայ երկաբնակի, որ էր սպարապետ հայոց և դավանակից յունաց, զոր յետոյ, մահուան թըւին ի համանուն թոռնէ սորա յայտնեցաւ աղանդն թոնդրակեցոց, յաւուրս Դաւթի կաթողիկոսի Կակաղեցոյ, եւ ի սոյն աւուրս բաժանեցան ի հայոց ազգն Ծաղ ի ձեռն Փարսմանայ ումեմն փառամոյ քահանայի, որպէս պատմէ սուրբն Ուխտանէս եպիսկոպոսն Սեբաստիոյ»⁴¹: Վկայաբանության մեջ սպարապետ Սմբատ Բագրատունու (752–775) թոռը՝ Սմբատ Աբլաբասը (Նոստովանող), հանդես է գալիս որպէս Սյունեցու քաղկեդոնիկ հակառակորդ: «Ըստ երևույթին այն հանգամանքը, որ հայադավան հեղինակների պատկերացումով քաղկեդոնականությունը հաճախ նույնպէս որպէս հերձված կամ աղանդ էր նշվում, — գրում է պատմաբան Ա. Հովհաննիսյանը, — առիթ է ծառայել Այրիվանեցուն քաղկեդոնականության հարած Սմբատ Աբլաբասին չփոխել թոնդրական աղանդի հիմնադիր Սմբատ Զարեհավանցու հետ»⁴²: Այրիվանեցու պատկերացումով 822–855 թթ. Հայաստանում իշխած Սմբատ Բագրատունին և սրա ժամանակ գահակալած կաթողիկոսն ու թոնդրակում ծայր առած աղանդի հիմնադիր Սմբատ Զարեհավանցին ժամանակակիցներ էին: Վերոբերյալ վկայությունը ցույց է տալիս, որ Այրիվանեցու համար աղբյուր է հանդիսացել Ուխտանեսի պատմության մեջ չհասած երրորդ գիրքը, որից նա առել է հունադավան հայերի՝ ծաղերի մասին հաղորդած տեղեկությունները⁴³: Քաղկեդոնական Փարսման քահանայի ակտիվ գործակցությամբ «Ծոնդէացիսն», որոնք բնակվում էին Հայաստանի Աղվանքին սահմանակից չրջաններում Հայոց եկեղեցուց Վրաց եկեղեցու գիրկն են անցնում⁴⁴: Անունների շփոթությամբ հանդերձ Այրիվանեցու վկայությունը

⁴⁰ Մխիթարայ Այրիվանեցու Պատմութիւն հայոց. 1860, 54:

⁴¹ Յ ո վ ս է փ ե ա ն ց. 1931, 19: «Յաւուրս տէր Դաւթի Փարսման քահանայ թվականի կակաղեցի որոշեալ ի հայոց ի Վիրս դարձոյց զԾոնդէացիսն, այս է Ծաղն, որ կան այժմ ի հոռումս» (Մխիթարայ Այրիվանեցու Պատմութիւն հայոց. 1860, 54):

⁴² Հ ո վ հ ա ն ի ս յ ա ն. 1957, 340:

⁴³ X–XI դդ. պատմիչ Ուխտանես եպիսկոպոսի «Պատմութիւն հայոց» երկատիրությունը բաղկացած է երեք մասից: Համաձայն նրա պատմության ընծայականի՝ երրորդ մասը նվիրված է եղել ծաղերի, նրանց երկրի, քաղաքների, վանքերի և մկրտության պատմությանը:

⁴⁴ Ըստ Ն. Աղունցի՝ Մխիթար Այրիվանեցին սխալվում է՝ նույնացնելով ծոնդեացիներին ծաղերի հետ: Ծոնդեացիները քրիստոնյաներ էին և IX դ. հարում են Վրաց եկեղեցուն, մինչդեռ ծաղերը, որոնց մասին խոսում է Ուխտանեսը, միայն X դ. վերջին դարձան քրիստոնյա (Ա դ ո ն ց. 2006, 541): Ն. Մաուր ենթադրում է ծաղերը

կարևոր է այնքանով, որ Թոնդրակյան աղանդի սկիզբը հստակ թվագրվում է IX դ. առաջին կեսին: Ակներև են դառնում քաղկեդոնականների, մասնավորապես՝ Վրաց եկեղեցու գործնական քայլերը Հայոց եկեղեցու դավանանքի հետևորդներին իրենց կողմը գրավելու ուղղությամբ: Քաղկեդոնականություն ընդունած հայերը հետզհետե սկսում են ապագաայնանալ, ձուլվել վրացիների, հույների և սիրիացիների հետ⁴⁵:

Դավիթ Բ կաթողիկոսի աթոռակալության ժամանակաշրջանը նշանավոր է նաև քրիստոնեական կրոնի համար անձնուրաց նահատակության բազմաթիվ օրինակներով, որոնք պահպանվել են վկայաբանական երկերի էջերում: Անձնագոհության այդպիսի դրվագ է Հովսեփ ու Սահակ իշխանների նահատակությունը, որոնց հետագայում եկեղեցին սրբադասել և տոն է սահմանել նրանց պատվին: Կայսիկ ցեղի արաբ իշխաններից մեկը հաստատվում է Կարինում և ամուսնանում տեղի մի հայ քրիստոնյա աղջկա հետ: Նրանք ունենում են երեք որդի, որոնց բարեպաշտ կիներ դաստիարակում է քրիստոնեական հավատով և ծեսերով⁴⁶: Հովսեփը, Սահակը և երրորդ զավակը, որի անունը պատմությունը չի պահպանել մեծանում են որպես քրիստոնյաներ՝ կրելով իսլամական Յուսուփ և Իսակ անունները: «Հասունանալով»՝ Հովսեփն ամուսնանում է, ունենում զավակներ, սակայն շուտով բացահայտվում է մուսուլմանի քրիստոնեացած զավակների գաղտնիքը: Եղբայրները փորձում են փախչել Բյուզանդիա: Ինչպես վկայում է նահատակների վարքը, այդ գործում նրանց փորձում է օգնել իշխան Քուրդիկ Մամիկոնյանը⁴⁷: Սակայն արաբական իշխանությունները խափանում են նրանց փախուստը, և եղբայրները ձերբակալվում են: Իսլամի օրենսդեպքները փորձում են նրանց համոզել հրաժարվել քրիստոնեությունից. անգամ հայրը հորդորում է առերես ընդունել և հետո անցնել հույների երկիր, սակայն եղբայրները մնում են անդրդվելի՝ ասելով. «Քրիստոնեայ եմք, և արհամարհեցաք զմոլար սնտոի ուսմունս մեր հայրենի (նկատի ունի իսլամը – Վ. Ա.)»⁴⁸: Իսլամն ուրանալու համար տեղական դատավորի վճռով եղբայրները դատապարտվում են գլխատման Կարինի քաղաքապետի կողմից, որ «գիշխանութիւն ունէր քաղաքին և գաւառին Կարնոյ»⁴⁹: Նրանց մահվան վճիռը, ինչպես հավանական է համարում Օրմանյան սրբազանը, իրագործվել է տեղական դատավորի ձեռքով՝ առանց ոստիկա-

քաղկեդոնիկ հայեր են, որոնք ապրել են հարավային Հայաստանում, իսկ ծոնդեացիները, որպես ազգակից ժողովուրդ, ապրել են Հյուսիսարևելյան Հայաստանում: Այս աշխարհագրական շրջանը համապատասխանում է վրացիների միսիոներական գործունեության շրջանին (Mapp. 1905, 30–31, ծանոթ. 2): Ն. Ակինյանը, ըստ էության, տարբերակում չի դնում «ծաղ»-երի և «ծաղեացի»-ների միջև: Գտնում է՝ նրանք ազգությամբ հայ էին, որոնք ընդունել են քաղկեդոնականություն (Ա կ ի ն ե ա ն. 1910, 77–79):

⁴⁵ Լ ե ո. 1967, 460:

⁴⁶ Լիակատար վարք և վկայաբանութիւն սրբոց. 1813, 293, Յ ա յ ս մ ա -
ւ ու ը ք. 1706, Արացի ժե, Յունվարի իբ:

⁴⁷ Լիակատար վարք և վկայաբանութիւն սրբոց. 1813, 295:

⁴⁸ Լիակատար վարք և վկայաբանութիւն սրբոց. 1813, 296:

⁴⁹ Լիակատար վարք և վկայաբանութիւն սրբոց. 1813, 295:

նի մասնակցություն⁵⁰: Եղբայրների նահատակությունը տեղի է ունեցել 808 թվականի արաց ամսի 15-ին⁵¹ «յաւուր Հինգշաբթու»⁵²:

Հայաստանի ներքին ինքնավարության ամրապնդումը Հովհաննես Դ Ովայեցու օրոք

833 թ. Դավիթ Բ Կակաղեցուն փոխարինում է Հովհաննես Դ-ն՝ Կոտայք գավառի Ովայք գյուղից, որին Վարդան պատմիչը բնութագրում է որպես «այր սուրբ և պարկեշտ»⁵³: Թովմա Արծրունին նրան որակում է իբրև եկեղեցական և բարոյական բարեկարգության նախանձախնդիր հայրապետ, որը «յաւետ հրաշիւք յաւրինէր զկարգս սրբոյ եկեղեցւոյ ուղղափառ առաքելական հաւատոց ի Տէր Հիսուս Քրիստոս»⁵⁴: Շեշտվում է, որ նրա խստապահանջությունները հաճելի չէին շատերի, այդ թվում՝ իշխանների համար, որովհետև նա «դնէր ուխտս ընդ իշխանս աշխարհիս Հայոց», հորդորում էր արժանի լինել քրիստոնեական պատգամներին, որպեսզի «վկայեսցէն ըստ անուան քրիստոնէութեանն եւ գործքն»⁵⁵:

Հովհաննես կաթողիկոսի ընտրությունը հարթ չի ընթացել, որովհետև այդ հարցում հայ նախարարների շրջանում համաձայնություն չի եղել: Տարոնի և Սասունի իշխան Բագարատ Բագրատունին (826–851), ով «համանատար եւ իշխան իշխանացս Հայոց գտանէր», դժգոհ է մնում այդ ընտրությունից, որովհետև «առանց կամաց նորա եղեւ հայրապետին հաստատութիւն»⁵⁶: Բագարատն այդ ժամանակ այնքան ուժեղ էր, որ խալիֆից նույնիսկ պահանջում էր Արմինիայի ոստիկանի լիազորությունները⁵⁷: Նա միշտ աչքի է ընկել կրոնական ու եկեղեցական խնդիրներով իր հետաքրքրվածությամբ և ի սկզբանե համաձայն չէր Հովհաննես Ովայեցու ընտրությանը: Բայց, ինչպես կարծում է Ա. Տեր-Ղևոնդյանը, Բագարատ և Սմբատ Բագրատունի եղբայրների միջև

⁵⁰ Օրմանեան. 2001, 1073, § 633:

⁵¹ Հաւաքումն պատմութեան Վարդանայ վարդապետի. 1862, 91: Այս օրը համապատասխանել է շարժական տոմարի հոկտեմբերի 19-ին, մինչդեռ Յայսմավուրքն անշարժ տոմարով այն դնում է հունվարի 22-ին (Յայսմավուրք. 1706, Արացի ժե, Յունվարի իբ):

⁵² Անեցի եւ շարունակողներ. 2014, 161:

⁵³ Հաւաքումն պատմութեան Վարդանայ վարդապետի. 1862, 80:

⁵⁴ Արծրունի եւ Անանուն. 2010, 146:

⁵⁵ Արծրունի եւ Անանուն. 2010, 146–147:

⁵⁶ Դրասխանակերտցի. 2010, 429: Թովմա Արծրունին նշում է նրա բարձր կարգավիճակը հայ իշխանների մեջ. «Իշխան Տարունոյ Բագարատ, վասն զի ունէր յայնժամ զգլխատրութիւն բարձակցութիւն իշխանաց Հայոց» (Արծրունի եւ Անանուն. 2010, 141): Վարդան պատմիչը Բագարատին կոչում է «իշխան Տաւրոս լերինն» (Հաւաքումն պատմութեան Վարդանայ վարդապետի. 1862, 80): Ստեփանոս Օրբելյանի երկում նա անվանվում է «իշխանն Հայոց» (Ստեփաննոսի Սիւնեաց եպիսկոպոսի Պատմութիւն տանն Սիսական. 1861, 122): Մ. Չամչյանը նրան բնութագրում է որպես «այր հզօր և երևելի» (Չամչյան. 1984, 441): Մ. Օրմանյանն իրավացիորեն կարծում է, որ Բագարատը Հայաստանում պատրիկոսության պաշտոնով եղել է արաբ ոստիկանի տեղակալը, իսկ հայոց սպարապետությունը վարել է Սմբատը (Օրմանեան. 2001, 1084, § 640):

⁵⁷ Եղիազարյան. 2011, 31, 92:

Հարաբերություններն այդ ժամանակ այնքան լարված էին, որ Բագարատը հնարավորություն չուներ միջամտելու նոր հոգևոր առաջնորդի ընտրությանը, ինչպես նաև չէր խառնվում Հայաստանի հյուսիսային և հյուսիսարևելյան շրջանների գործերին⁵⁸։ Բագարատը հայտնի էր աստվածաբանական-կրոնական հարցերում բանիմացությամբ, որի մասին վկայում է ասորի գիտնական, սարկավագ Նանան. «Յորժամ ասէ ըմբռնեալ լինէր մեծն և երեւին այն իշխանն հայոց վսեմամիտն, որ եւ զբաւանդակն յանձին բերէր ունել զգիտութիւն, որ ի Քրիստոս հաւատոցն. որ եւ նախանձ ոչ փոքրագոյն վասն Քրիստոսի միշտ յանձին կրէր՝ կշտամբել եւ յանդիմանել զհերձուածողացն դասս»⁵⁹։

Հովհաննես Ովայեցու թեկնածությունը պաշտպանել են սպարապետ Սմբատ Բագրատունին և Սյունյաց իշխան Գրիգոր Սուփանը, ովքեր օգնել են նրան զբաղեցնել կաթողիկոսական գահը։ Բագարատը հարմար առիթ էր փնտրում Հովհաննեսի փոխարեն կաթողիկոս դարձնել մեկ ուրիշին⁶⁰։ Նա կաթողիկոսից հրաժարվելու և նրան մեկուսացնելու վերաբերյալ հրովարտակ է արձակում՝ ասելով՝ «ի բաց կալ յընդունելոյ զհաւտապետն» ու ի մտի ունենալով՝ «կացուցանել հայրապետ ըստ իւրումն ձեռներիցութեան»⁶¹։ Բագարատ Բագրատունուն այս հարցում աջակցում էին որոշ ընդդիմադիր հոգևորականներ, որոնցից ոմանք նույնիսկ անդամ էին «յընտանեաց տան կաթողիկոսաւրանին»։ Զրպարտողները Հովհաննես հայրապետի վերաբերյալ «լեզուաւք նենգաւորաւք բանս ասիրատոս բամբասանաց ի վերայ յաւդէին»։ Այս գործի մեջ, հավանաբար, ներքաշված էին Բագարատի թեկնածու եպիսկոպոսը և նրա համախոհները։ Չի բացառվում՝ չարախոսները, որոնք կաթողիկոսի դեմ ամբաստանադիր են ներկայացրել Հայոց իշխան Բագարատին, խրախուսվել են հենց վերջինիս կողմից։ Հովհաննեսին մեղսագրվող արարքները հստակ հայտնի չեն, սակայն որոշ կցկտուր տեղեկություններ թույլ են տվել Մ. Օրմանյանին ենթադրել, որ մեղադրանքը վերաբերում էր բարոյական ինչ-ինչ խնդրի⁶²։ Կաթողիկոսը հեռանում է Այրիվանք կամ Գեղարդավանք և ապրում այն վայրում, որը կոչվում էր «բնակետոյ սրբոյն Սահակայ»։ Այստեղից ամբաստանված հայրապետը պատասխանում է Բագարատի հրովարտակին, հիմնավորում է իր անմեղությունն ու նզովում «նանրալեզու հայհոյիչք» անձանց։ Սկզբնաղբյուրներն այս իրադարձությունները թվագրում են «ժամանակի իբր ի վեցերորդ ամի իշխանութեանն Բագարատայ և յովթերորդ ամի կաթողիկոսութեանն Յովհաննու», այսինքն՝ 841 թվականին⁶³։

⁵⁸ Тер-Гевондян. 1977, 136. Այս հանգամանքը վկայում է IX դ. կեսերին Հայոց ավագանու՝ երկու բեկոի տրոհվածության մասին (Հայոց պատմություն. 2014, 9)։

⁵⁹ Ա կ ի ն յ ա ն. 1922, 138։ Հ մ մ տ. Չ ա մ չ յ ա ն. 1984, 444։

⁶⁰ Դ Ր ա ս ի ա ն ա կ ե Ր տ ց ի. 2010, 429։ Բագարատի քրիստոնեական բարեպաշտության մասին է վկայում Մուշի Սուրբ Փրկիչ եկեղեցու կառուցման փաստը (Ա Ր ծ Ր ու ն ի եւ Ա ն ա ն ու ն. 2010, 151)։

⁶¹ Դ Ր ա ս ի ա ն ա կ ե Ր տ ց ի. 2010, 429։

⁶² Օ Ր մ ա ն ե ա ն. 2001, 1085, §640։

⁶³ Դ Ր ա ս ի ա ն ա կ ե Ր տ ց ի. 2010, 428, Չ ա մ չ յ ա ն. 1984, 443։

Կաթողիկոսի նկատմամբ Բագարատ Բագրատունու նախաձեռնած արշավը հայ նախարարական ու հոգևոր շրջանակներում միանշանակորեն չի ընդունվում: Ի պաշտպանություն հայրապետի և ընդդեմ Բագարատի հրովարտակի հանդես են գալիս շատ հոգևորականներ: Կաթողիկոսի պաշտպաններին գլխավորում էին Սմբատ Բագրատունին ու Գրիգոր Սուփան Սյունյաց իշխանը: Բագարատ Բագրատունու նախաձեռնությունը գումարվում է «համագունդ ի միասին եկեալք» նախարարների և եպիսկոպոսների ազգային-եկեղեցական ժողով, որը պետք է քններ և պարզեր կաթողիկոսին հասցեագրված մեղադրանքները⁶⁴: Ժողովում քննության են դրվում չարախոսների, «մանաւանդ երից արանց՝ որք երեւելիքն էին» փաստարկները, և ապացուցվում են Հայոց հայրապետի անմեղությունն ու մեղադրանքների ստահոգությունը: Հովհաննես պատմիչի խոսքերով՝ «ստուգագէտ իմացուածիւ» հաստատվում է «նանիր իժաթոյն չրթանց չար հայհոյացն ստուղծելը»: Ժողովով արդարացվելուց հետո «Հաստատեն դարձեալ յաթոռն սրբութեան զայրն Աստուծոյ»:

Կաթողիկոսի աթոռին վերականգնվելը հնարավոր եղավ երկրում արաբների ստեղծած քաղաքական բարդ իրադրության հետևանքով, որը թույլ չտվեց Հայոց իշխան Բագարատ Բագրատունուն, ինչպես հարկն է, զբաղվել այդ հարցերով⁶⁵: Հայր Չամչյանը հաղորդում է, որ ժողովը գումարվել է Երնջակում⁶⁶: «Պատիժք պատուհասի հասին ի վրայ երից բամբասողացն», որոնք գլխավորում էին կաթողիկոսի դեմ արշավը: Իր հովվապետության մնացյալ տարիները Հովհաննեսը Ուլայեցին անցկացնում է շրջապատված հարգանքով և պատվով, իսկ եկեղեցին՝ «նորոգապէս պայծառանայր»:

Սկզբնաղբյուրները վկայում են, որ Հովհաննես Դ-ն աթոռակալել է «ամս քսան եւ երկու» (833–855): Նրա աթոռակալության ժամանակաշրջանը համընկնում է Մովսեսիմ-Պիլլահ (833–842), Աբու-Ջաֆար-Հարուն-ալ-Վաթիք-Պիլլահ (842–847) և վերջիններիս եղբայր Մովսես-Ֆաթիմ-Ալալլահ (847–861) իսլամիզմի գահակալությանը: Չնայած ամիրապետների տարբեր անվանումներին երեքն էլ հայոց մեջ հիշատակված են միևնույն Ջաֆար անունով, որը, հավանաբար, պայմանավորված էր այդ անվան տարածված լինելու իրողության հետ:

Խալիֆայության պարսից տարրը, իսլամը ընդունելով հանդերձ, փորձում էր հակադրվել արաբներին չիականության դրոշի ներքո: Հովհաննես Ուլայեցու հովվապետության շրջանում սկսվում է մի հզոր շարժում, որը պատմության մեջ հայտնի է Խուրամիդյան կամ Բաբեկյան շարժում անունով: Միջնադարյան բոլոր շարժումների նման այն հանդես էր գալիս կրոնական քողի տակ: Շարժման առաջնորդ Ջավիդանի սպանությունից հետո այն գլխավորում է Բաբեկը, ով հայկական սկզբնաղբյուրներում հայտնի է Բաբան անունով: Նա գրավում է Պարսկաստանի հյուսիսարևմտյան ու արևմտյան շրջանները և աշխատում իր իշխանությունը տարածել նաև Հայաստանի արևելյան

⁶⁴ Ե Ղ ի ա զ ար յ ա ն. 2020, 101:

⁶⁵ Ա կ ի ն ե ա ն. 1922, 135: Բագարատ Բագրատունու՝ այլ գործերով զբաղվածության մասին վկայող փաստերից մեկը նրա մասնակցությունն է 838 թ. դեպի Անկյուրա և Ամորի արաբների հաղթական արշավանքին (Ե Ղ ի ա զ ար յ ա ն. 2011, 31):

⁶⁶ Չ ա մ չ յ ա ն. 1984, 443:

մասում: Արաբական լծից ազատագրողից նա շուտով վերածվում է ամենախկական նվաճողի՝ կոտորելով բնակչությանը և ահ ու սարսափ տարածելով: Ինչպես հավաստում է Ստեփանոս Օրբելյանը, Բաբելը կնության էր առել Վասակ Սյունու դստերը և «առնէր ընդ ձեռամբ իւրով զգաւառն»⁶⁷: Սակայն շուտով սյունեցիները «անհնազանդ» եղան Բաբելի «հրամանի և օրինաց»: Նրա դեմ ընդվզում է Բաղասական գավառի բնակչությունը, և նա Աբլ Ասադ Աղվանեցու օժանդակությամբ սաստիկ կոտորած է կազմակերպում՝ «մաշեաց մինչ ի կանայս և մատաղ մանկտիս»⁶⁸: Հաջորդ տարին Բաբելը ներխուժում է Գեղարքունիք, կոտորում մոտ 15000 մարդ, քանդում և ավերում է հռչակավոր ծաղկուն Մաքենյաց վանքը: Հայերը թե՛ Սյունիքում և թե՛ Արցախում կատաղի դիմադրություն են ցույց տալիս պարսիկ ասպատակիչներին: Վարդան Արևելցին հիշում է Աբղհհերթ անունով մի պարսիկ զորավարի՝ դարձյալ «ի տանէն Ջահապայ», որը չորս հազարանոց զորքով ասպատակում է Սյունիքը: Նրա դեմ դուրս է գալիս Բաբելն Սյունին և պարտության մատնում նրան⁶⁹:

Կատարած ավերածությունների և բնակչության կոտորածների համար 837 թ. հայերը ձեռքակալում են Բաբելին: Դրա համար Սահլ Բագրատունին⁷⁰ Արմինիայի ու Ատրպատականի կառավարիչ Աֆշինից (835–840) ստանում է մեկ միլիոն դիրհեմ, իսկ նրա որդին, որ Բաբելին անձամբ տարել և հանձնել էր արաբներին, ստանում է հարյուր հազար դիրհեմ: Բաբելն իր 3300 յուրաքինների հետ տարվում է Բաղդադ և դատապարտվում տանջալից մահվան:

Հովհաննես Ովայեցու աթոռակալության ժամանակաշրջանում արդեն ուրվագծվում էր արաբական տիրապետության քայքայման հեռանկարը, ուժեղանում էին ներքին երկպառակությունները: Մուլթասիմ խալիֆն անգամ իր մայրաքաղաքը Բաղդադից տեղափոխում է Սամառա: Տեղական իշխանությունները ձգտում էին անկախանալ, և ավատատիրությունն իր տրոհիչ էությունամբ տիրապետող էր դառնում ամբողջ տերության տարածքում: Օգտվելով ստեղծված իրավիճակից՝ հայկական նախարարությունները հաստատում են իրենց իշխանությունը երկրի տարածքի գերակշիռ մասի վրա: Նրանք իրենց այնքան ուժեղ են զգում, որ անգամ պատերազմներ են մղում արաբ զորավարների դեմ՝ զենքով ապացուցելով իրենց իրավունքը հայրենական տիրույթների նկատմամբ: Այդ խառնակ ժամանակներում իրար ետևից փոխվում են ոստիկանները: Բաբելի ապստամբության ժամանակ խալիֆայությունը հնարավորություն չունեցավ հայաստանով լրջորեն զբաղվել, ուստի երկիրը կրկին հնազանդեցնելու ուղղությամբ լուրջ քայլ ձեռնարկվեց միայն 849 թ.:

⁶⁷ Ստեփաննոսի Սիւնեաց եպիսկոպոսի Պատմութիւն տանն Սիսական. 1861, 115, Կաղանկատուացի. 1983, 326:

⁶⁸ Ստեփաննոսի Սիւնեաց եպիսկոպոսի Պատմութիւն տանն Սիսական. 1861, 115, Կաղանկատուացի. 1983, 326:

⁶⁹ Հաւաքումն պատմութեան Վարդանայ վարդապետի. 1862, 80:

⁷⁰ Աբու Հանիֆա Ալ-Դինավարի. 2005, 218, Յակուբի. 2005, 387: Սմբատի որդի Սահլ (Սահլ իբն Սինբաթ) կամ Սունբաթ, արաբ պատմիչները նրա անվանը կցում են «ալ-արմանի»՝ հայազգի բառը: Ն. Ադունցը կարծում է, որ նրա հայրը՝ Սմբատը, Բագրատունի է (Ադունց. 2006, 517):

849 թ. Մովսեսի-Ալալահ խալիֆը⁷¹ (847–861) «զաւրաւ քաղ-մաւք» Հայաստան է ուղարկում «զումն ի յաւագ նախարարացն» Աբու Սաիդ Մուհամմադ իբն Յուսուֆին (850–851), որին հայ մատենագիրները հիշում են Աբուսեթ անվամբ։ Արքունիքը նրան այնտեղ էր գործուղել հարկային նոր խստութիւններ կիրառելու «առաքելութեամբ»։ Մոտ կես դար ներքին երկ-պառակութիւններից տկարացած և հարկային եկամուտներից զրկված խալի-ֆայութիւնը փորձում է բարելավել իր ֆինանսական վիճակն ու վերականգ-նել դիրքերը⁷²։ Տարոն-Սասունի իշխան Բագարատ Բագրատունին և Վա-սպուրականի իշխան Աշոտ Արծրունին փորձում են հարցը լուծել խաղաղ ճա-նապարհով, և կանխել Աբուսեթի մուտքը Հայաստան։ Բագրատի գլխավո-րած հայ իշխանների պատվիրակութիւնը սահմանադրւում հանդիպում է Աբուսեթին։ Վերջինիս ոսկի, արծաթ ու թանկարժեք նվերներ են մատուցում և խոստանում վճարել արքունի հարկերը, եթե արաբները համաձայնեն առանց պատերազմի հեռանալ Հայաստանի սահմաններից։ Այստեղ ուշադրութեան է արժանի այն, որ արաբները, իրենց սովորութեան համաձայն, թեև որոշել էին դավադրութեան և խաբէութեան միջոցով պառակտել հայերի ուժերը և իրենց կողմը գրավել աչքի ընկնող գործիչներին, սակայն տեսնելով նրանց «անյոյժ միաբանութիւն ուխտի» վճռականութիւնը՝ ստիպված են լինում կեղծել և քո-ղարկել իրենց իսկական մտադրութիւնները։ Հայերը, որ նախապես պատրաս-տել էին հարկերը, անմիջապէս «տան տանել նմա զհարկս եւ հասս արքունի, եւ դարձուցանեն զնա ընդ նոյն ուստի եկն»⁷³։ Աբուսեթը, ոչ այնքան իրեն մատուցված նվերներից շացած, որքան հայ նախարարների համախմբվա-ծութիւնից վախենալով, շտապ վերադառնում է Բաղդադ⁷⁴։ Մինչ այդ նա Աղձնիքի և Արգնի էմիր, Բագարատ Բագրատունու քրոջ ամուսին Մուսա իբն-Ջուրարային նշանակում է Հայաստանի կառավարիչ և ուղարկում Տարոն՝ հարկերը հավաքելու ու կոտրելու հայերի դիմադրական ուժը։ Մուսան ներ-խուժում է Տարոն և հասնում Բագրատի ձմեռանոց՝ Մուշ։ Քանի որ թշնամու ուժերը մի քանի անգամ գերազանցում էին հայերին, Բագրատը օգնութեան է կանչում Աշոտ Արծրունուն։ Վերջինս իր եղբայրների ու մարտական պատ-րաստականութեամբ երկու տասնյակ այլ նախարարների հետ շտապում է Տարոն՝ Բագրատին օգնութեան։ Հայ նախարարների միացյալ զորքը ուժգին ջարդ է տալիս թշնամուն ու հալածելով հասնում մինչև Բաղեշ։

Բացի Մուսայից, Աբուսեթը հատուկ ծրագրով Հայաստան է ուղարկում նաև Ալա-Մովափին, ով Մանազկերտի կայսիկ ցեղից էր։ Վերջինիս հանձնա-րարված էր ասպատակել Վասպուրականը, կողոպտել ու կոտորել բնակչու-թյանը, հարկերը գանձել առավելագույն չափով⁷⁵։ Արաբական զորքերի գլուխ անցած՝ Ալա-Մովափին Վասպուրականում «գերփէր, աւերէր, յափշտակէր կապուտ կողոպուտ գործէր ընչից եւ ստացուածոց, յափշտակէին զայր եւ զկին

⁷¹ Իր չարագործութիւնների և գազանային բռնակալութեան համար այնքան վատ համբավ էր ստացել, որ նրան անվանել են «արաբների Ներոն» (Լ ե ո. 1967, 427)։

⁷² Ն ա լ բ ա ն դ յ ա ն. 1956, 121։

⁷³ Արծրունի եւ Անանուն. 2010, 141։

⁷⁴ Մ ե ի ք-Բ ա խ շ յ ա ն. 1968, 354։

⁷⁵ Արծրունի եւ Անանուն. 2010, 142, 144։

եւ զժառանգութիւնն նոցա: Առնէր ասպատակ եւ ի կողմն Անձաւացեաց տէրութեանն, եւ անտի եւս առնուին աւար ի պատճառս ոռձկաց պիտոյից այրուծիոյն»⁷⁶: Նրա հարկային բռնութիւնները զսպելու անհաջող փորձերը հայերին մղում են վճռական գործողութիւններին: Արճուճ գյուղի մոտ Արծրունյաց իշխան Աշոտն իր զորքով հարձակվում ու կոտորում է Այա-Ծովափիի հրոսակախումբը:

Տարոնի և Վասպուրականի ապստամբութիւնները վերջնականապէս ճնշելու ու արաբների խայտառակ պարտութիւնն վրեժը լուծելու համար Մովսէս վաթքիլն Աբուսեթին երկրորդ անգամ է ուղարկում Հայաստան: Սակայն Աբուսեթը ճանապարհին մահանում է, և զորքերի հրամանատարութիւնը հանձնվում է նրա որդուն՝ Յուսուֆին, որը Հայաստան է հասնում 851 թ.: Մտնելով Աղբակ գավառ՝ նա գրավում է Հաղամակերտը: Աշոտը հարկերը կանոնավոր և անխափան վճարելու հավաստիացումներ պարունակող գրութիւններ և մեծ ընծաներով նրա մոտ է ուղարկում իր մորը՝ Հովհաննէ տիկնոջը: Արծրունյաց տիկնոջ դիվանագիտական առաքելութիւնը դրական արդյունք է տալիս, և Յուսուֆը զորքով շարժվում է Խլաթ: Ինչպէս վկայում է Թովմա Արծրունին, արտաքուստ բարեկամական վերաբերմունք ցույց տալով՝ նա ձերբակալում է Բագարատին և «զամենայն ազգատոհմն նորա», որոնց շղթայակալ ուղարկում է Սամառա⁷⁷: Այս փաստը հիշելով բարձրատիճան հոգևորական Հովհաննէս Դրասխանակերտցին, հավատարիմ դասային համերաշխութիւն կանոնին, առիթը բաց չի թողնում շեշտելու, որ դա Հովհաննէս Ովայեցի հայրապետի նկատմամբ Բագարատի անարդարացի վերաբերմունքի արժանի պատասխանն էր. «Եւ որ սակս սրբոյ հայրապետին զանիրաւն խորհէր, աստ ապա զիրաւացի պատուհաս վրէժնդրութեան ըստ արժանին յանձին իւրում կրէր»⁷⁸: Բագարատին ձերբակալելուց հետո Յուսուֆն ասպատակում և տակնուվրա է անում Տուրուբերանի ու Աղձնիքի շրջանները: Արաբական զորքերի ավերածութիւնները համաժողովրդական ցասում են առաջացնում հայ բնակչութիւնն մեջ: Ապստամբութիւնն առաջին ազդանշանը տալիս են Սասունի լեռնային շրջանի՝ Խուլթի գյուղացիները: Յուսուֆի դեմ եղած դժգոհութիւնն ու վրիժառութիւնն զգացումն ավելի էր մեծանում այն ժամանակ, երբ մարդիկ ոտնահարված էին տեսնում իրենց կրօնական զգացմունքները: Արաբ պատմիչների վկայութեամբ՝ ապստամբութիւնը նախապատրաստված էր հայ ազնվականների կողմից, որոնք հենվում էին ազատագրական պայքարի մեծ փորձ ունեցող քաջարի խութեցիների վրա⁷⁹: Խուլթի գյուղացիները՝ Հովնանի գլխավորութեամբ, հարձակվում են Մուշում կենտրոնացած արաբների վրա: Հայերի վճռական հարձակումից սարսափած Յուսուֆը փախչում և թաքնվում է Մուշի եկեղեցում, «որ յանուն Փրկչին մերոյ շինեալ էր յիշխանէն Բագարա-

⁷⁶ Արծրունի եւ Անանուն. 2010, 144:

⁷⁷ Արծրունի եւ Անանուն. 2010, 150, Բալագուրի. 2005, 282, Յակուբի. 2005, 393: Այս տեղեկատվութիւնն առկա է հայկական և արաբական բազմաթիւ սկզբնաղբյուրներում: Բագարատի երկու որդիներին՝ Աշոտին և Դավիթին, հաջողվում է փախչել ու ապաստանել Սասունի լեռներում (Դրասխան. 2010, 431):

⁷⁸ Դրասխանակերտցի. 2010, 430:

⁷⁹ Բալագուրի. 2005, 282:

Քրիստոսէ»։ Պատմությունը պահպանել է նրանցից չորսի անունը՝ Ատոմ Անձևացի, Մլեհ Վարաժնունի, Գևորգ Բողկացի և Վասակ Ակեացի⁸⁴։ Ոչ տանջանքները և ո՛չ խոստումները չեն ընկճում նրանց, ու նրանք կտրակա- նապես հրաժարվում են իսլամ ընդունելուց, որոնց նահատակությունը տեղի է ունեցել Հայոց 302 թ. մեհեկան ամսի 25-ին. այն համապատասխանում է 853 թ. նոյեմբերի 17-ին⁸⁵։ Դվինում վկայվածները կոչվել են Ատոմյանք՝ Ատոմ Անձևացու անվամբ և անգամ Նոր Ատոմյանք՝ առաջիններից տարբերվելու համար։ Հովհաննես կաթողիկոսի կոնդակով մեհեկանի 25-ը հայտարարվում է Նոր Ատոմյանց նահատակների հիշատակի օր։

IX դ. 30-ական թվականներին՝ Հովհաննես Ովայեցու գահակալության ժա- մանակաշրջանում, Հայաստանում Թոնդրակյան աղանդի ձևով սկզբնավոր- վում է մի շարժում, որը զարգացած ավատատիրության դարաշրջանում շուրջ երկու դար ցնցում է Հայաստանը։ Այն ուղղված էր Հայոց եկեղեցու դեմ, իսկ նրա առաջնորդ Սմբատ Զարեհավանցին, Գրիգոր Մազիստրոս Պահլավունու խոսքերով, «ի հիմաց սասանեց առաքյալներին և մարգարեներին»⁸⁶։ Սկզբ- նաղբյուրներում հստակ վկայություններ չկան աղանդի հիմնադիր Զարեհա- վանցու գործունեության մեկնարկի ժամանակի մասին, ինչն առիթ է տվել ուսումնասիրողներին աղանդի սկիզբ համարել IX դ. առաջին կեսը⁸⁷, նույն դարավերջը և հաջորդ դարասկիզբը։ Ժամանակագրական չփոթի սկզբնաղբ- յուրներից մեկն Ասողիկի վկայությունն է. խոսելով Հովհաննես Դրախանա- կերտցի կաթողիկոսի գահակալության մասին, որը տեղի է ունեցել 898 թ. նա գրում է. «Յաւուրս սորա երեւեցաւ Սմբատ Թոնդրակաց առաջինն ի Զարեհա- ւան գեղջէ, ի Ծաղկոտն գաւառէ, հակառակ ամենայն քրիստոնէական կար- գաց»⁸⁸։ Սակայն այս տեղեկությունը հերքվում է ծանրակշիռ այլ վկայութ- յուններով։ Ըստ XI դ. գիտնական, ռազմական և քաղաքական գործիչ Գրիգոր Մազիստրոսի՝ Սմբատ Զարեհավանցին «երեւեցաւ յաւուրս տեառն Յովհաննի- սի և Սմբատայ Բագրատունւոյ»⁸⁹։ Իր թղթերում Մազիստրոսը հստակեցնում է, թե ում նկատի ունի «տեառն Յովհաննիսի» և «Սմբատայ» անունների ներ- քո։ XI դ. 50-ական թվականների սկզբին իր մի թղթում դիմելով Թոնդրակյան դեկավարներին՝ Մազիստրոսն ասում է. «... զհարիւր և զեօթանասուն ամ երեքտասան քահանայապետք Հայոց Մեծաց, նոյնչափ և Աղուանիցն և բիւր եպիսկոպոսք և անթիւ քահանայք և սարկաւագունք բողոքեցին ձեզ և ոչ լուայք, խօսեցան և յանդիմանեցին և ոչ պատկառեցայք, անիծեցին և ար- տաբքսեցին և ոչ զղջացայք»⁹⁰։ Նույն ժամանակներում գրած մեկ այլ թղթում նա փաստում է, թե Թոնդրակյաններն «աւելի քան զերկերիւր ամ ապականեալ

⁸⁴ Արծրունի եւ Անանուն. 2010, 192:

⁸⁵ Արծրունի եւ Անանուն. 2010, 193, Հաւաքումն պատմութեան Վարդանայ վարդապետի. 1862, 80, Սամուէլ Անեցի եւ շարունակողներ. 2014, 165, Օրմահեան. 2001, 1102, §649: Համաձայն անշարժ տոմարի այն դրվել է մարտի 3-ին (Չամչյան. 1984, 448):

⁸⁶ Մազիստրոսի թղթերը. 1910, 153:

⁸⁷ Այս տեսակետն առաջին անգամ հայտնել է Մ. Չամչյանը (Չամչ- յան. 1984, 884):

⁸⁸ Ասողիկ. 2010, 742:

⁸⁹ Մազիստրոսի թղթերը. 1910, 153:

⁹⁰ Մազիստրոսի թղթերը. 1910, 154:

զաչխարհա ամենայն, արձանացուցին զայնպիսի ատրուշան իւրեանց վաւաշ մոլութեանն»⁹¹։ Սրան համապատասխանում է Մագիստրոսի մյուս վկայությունը, երբ շեշտում է, թե մինչև իր ժամանակն ավելի քան 15 կաթողիկոս բանադրել է թոնդրականներին⁹²։ Նշելով թոնդրականների՝ շուրջ 200-ամյա գոյության և ավելի քան 15 կաթողիկոսից նրանց բանադրված լինելու մասին՝ Մագիստրոսը նկատի ուներ աղանդի կազմավորման և հայ կաթողիկոսների նրանցից սահմանադատվելու սկզբնակետը⁹³։ Թոնդրականների սկզբնավորումը նա տեսնում է Հովհաննես Ուկայեցի կաթողիկոսի (833–855) և նրան ժամանակակից Սմբատ Բագրատունի սպարապետի (822–855) ժամանակաշրջանից։

Հովհաննես Դ հայրապետի ակթուակալության վերջին տարիներին թոնդրական աղանդի ձևով հայ ժողովրդի հոգևոր անվտանգությանը սպառնացող մարտահրավերին գումարվել էին նաև թուրք զորավար Բուղայի ավերածությունները, որոնք մեծ տառապանք էին պատճառում հայ ազգաբնակչությանը։ Չնայած ծեր տարիքին՝ ժողովրդի հոգևորով ապրող հովվապետը շրջում էր Հայաստանի գավառներում, գոտեպնդում ու հուսադրում ժողովրդին, փորձում էր ուրացությունից հետ պահել նախարարներին։ Նոր Ատոմյանների նահատակությունից (853) մոտ մեկուկես տարի հետո՝ 855 թ. Գեղարքունիքի Սոթք գավառում՝ Մաքենոցաց վանքում գտնվելու ժամանակ, Հովհաննես կաթողիկոսը վախճանվում է։

Եզրակացություն

Այսպիսով՝

– VIII–IX դարերում կառուցվածքային փոփոխությունների է ենթարկվում Հայոց եկեղեցու տնտեսական հիմքը կազմող ավատական հողատիրությունը, նոր ձևավորված վանքերը ստեղծում են իրենց ենթակառուցվածքները, ձևով բերում ընդարձակ հողատարածություններ։ Դավանաբանական վեճերի, իսլամի կողմից տեղի ունեցող գրոհների պայմաններում եկեղեցին ամրապնդում է իր տեսական հիմքերը, ստեղծում ինքնուրույն օրենսդրություն։ Հայոց եկեղեցու ծիսադավանական և աստվածաբանական սկզբունքների հստակ սահմանումը նպաստում է ազգային ու կրոնական ինքնության գիտակցման զարգացմանը։

– Քրիստոնյաների շարունակական կրոնական հալածանքները բարձրակետին են հասնում IX դ. կեսին՝ Մովսիսաբեքի խալիֆի օրոք։ Հայ եկեղեցական գույքի և ունեցվածքի բռնազրավումներին զուգահեռ՝ առաջնային է դառնում հայերի հավատափոխությունը, որի վկայությունը, պատմիչների մոտ պահպանված տեղեկություններից բացի, այդ շրջանում վկայաբանական գրականության լայն տարածվածությունն է։

– IX դ. առաջին կեսին Հայաստանում տեղի են ունենում եկեղեցական կրոնական լուրջ գործընթացներ։ Ասորի միաբնակ եկեղեցու հեղինակավոր ներկայացուցիչ Նանա սարկավազի՝ Հայաստան ժամանելու փաստից ենթադրվում է, որ փորձ էր կատարվում ստեղծել հայ և սիրիական եկեղեցիների

⁹¹ Մագիստրոսի թղթերը. 1910, 65։

⁹² Մագիստրոսի թղթերը. 1910, 169։

⁹³ Հ ո վ հ ա ն ն ի ս յ ա ն. 1957, 338։

միություն, ձևավորել ընդհանուր «ռազմաճակատ» քաղկեղտնականության դեմ:

— Դավիթ Բ Կակաղեցու օրոք Հայաստանի ինքնավարության վերականգնման ոչ դյուրին ընթացքն ուղեկցվում է խալիֆայական իշխանության գերակայությունը չճանաչող տեղական կառավարիչների ապստամբություններով, որոնք մեծ ավերածություններ են պատճառում Հայաստանին: Նրա օրոք արաբների կրոնական հալածանքներին զուգահեռ՝ ակտիվանում են քաղկեղտնականների ոտնձգությունները Հայոց եկեղեցու հետևորդների նկատմամբ:

— Հովհաննես Դ Ովայեցի կաթողիկոսն ընտրվել է առանց «իշխան իշխանացս հայոց» Բագարատ Բագրատունու համաձայնության: Պաշտոնանկ արված, այնուհետև վերականգնված կաթողիկոսը խստապահանջ հետևողականությամբ աշխատել է կանխել հայ նախարարների հավատալքության դեպքերը, պահանջել հետևել քրիստոնեական պատվիրաններին: Նրա աթոռակալության ժամանակաշրջանում արդեն ուրվագծվում էր արաբական տիրապետության քայքայման հեռանկարը, ուժեղանում էին ներքին երկպառակությունները: IX դ. կեսին Հայաստանում ծայր է առնում ազատագրական շարժում հարկահավաքությունից արաբներին հեռացնելու պահանջով, որը տանում էր ինքնավարության վերականգնմանը: Հայկական նախարարություններն իրենց իշխանությունն են տարածում երկրի տարածքի գերակշիռ մասի վրա: Նրանք իրենց այնքան ուժեղ են զգում, որ անգամ պատերազմներ են մղում արաբ զորավարներ Աբուսեթի, Յուսուֆի և Բուղայի դեմ՝ զենքով ապացույցելով իրենց իրավունքը հայրենական տիրույթների նկատմամբ:

Վարդան Ալեքսանյան — պ. գ. թ., դոցենտ, ԵՊՀ Իջևանի մասնաճյուղի Հայոց պատմության և հասարակագիտության ամբիոնի դասախոս: Գիտական հետաքրքրությունը՝ Հայոց եկեղեցու պատմությունն ավատատիրության դարաշրջանում: Հեղինակ է 3 ուսումնամեթոդական ձեռնարկի և շուրջ 20 հոդվածի: vardanalexanyan406@gmail.com

ԳՐԱԿԱՆՈՒԹՅՈՒՆ

Աբու Հանիֆա Ալ-Դինավարի. 2005, Մատյան Երկարապատում ավանդությունների (Քիթաբ ալ-Ախբար ալ-Թիվալ), Երևան, ԵՊՀ հրատ., 703 էջ:

Աբու Յուսուֆ. 2005, Հարկերի մատյան (Քիթաբ ալ-Խարաջ), Երևան, ԵՊՀ հրատ., 703 էջ:

Ադոնց Ն. 2006, Երկեր, հ. Ա, Երևան, ԵՊՀ հրատ., 648 էջ:

Ալիշան Ղ. 1890, Այրարատ, Վենետիկ, Սուրբ Ղազարի տպ., 590 էջ:

Ալիմեան Ն. 1910, Կիրիոն կաթողիկոս վրաց. Պատմութիւն հայ-վրական յարաբերութեանց եղբներորդ դարու մեջ, Մխիթարեան տպարան, Վիեննա, 315 էջ:

Ալիմյան Ն. 1922, Թեոդորոս Ապիկուռա եւ Նանա ասորի Հայաստանի մէջ եւ Նանայի Յովհաննու մեկնութեան հայերէն թարգմանութիւնը. — Մատենադրական հետազոտութիւններ, Քննութիւն և բնագրեր, հ. Ա, Վիեննա, Մխիթարեան տպարան, 232 էջ:

Բալագուրի. 2005, Երկրների նվաճումը (Ֆուտուի ալ-Բուլդան), ԵՊՀ հրատ., 703 էջ:

Գրիգոր Մագիստրոսի թղթերը. 1910, բնագիրն յառաջաբանով և ծանոթագրություններով առաջին անգամ ի լոյս ընծայեց Կ. Կոստանեանց, Աղէքսանդրապոլ, Տպարան Գէորգ Մաճոյեանցի, 352 էջ:

Գրիգորյան Գր. 1973, Սյունիքի վանական կալվածատիրությունը IX–XIII դարերում, Երևան, ՀՍՍՀ ԳԱ հրատ., 267 էջ:

Եղիազարյան Ա. 2020, Ազգային-եկեղեցական ժողովները Հայաստանում Դ-ԺԱ դդ., «Սահմանադրական մշակույթ» միջազգային վերլուծական կենտրոն, Մայր Աթոռ Սուրբ Էջմիածին, 114 էջ:

Եղիազարյան Ա. 2010, Արաբական խալիֆայության Արմինիա վարչական շրջանը, ԵՊՀ հրատ., Երևան, 186 էջ:

Եղիազարյան Ա. 2011, Հայ Բագրատունիների տերությունը (885–908), Երևան, ԵՊՀ հրատ., 392 էջ:

Թովմա Արծրունի եւ Անանուն. 2010, Պատմություն տանն Արծրունեաց, Մատենադիրք հայոց, հ. ԺԱ, Ժ դար, Պատմագրություն, Գիրք Ա, Լիբանան–Անթիլիաս, ԵՊՀ հրատ., 795 էջ:

Լեո. 1967, Երկերի ժողովածու, հ. Բ, Երևան, «Հայաստան» հրատ., 786 էջ:

Լիակատար վարք և վկայաբանություն սրբոց. 1813, հ. Դ, Վենետիկ, Սուրբ Ղազարի տպ., 491 էջ:

Հայ ժողովրդի պատմություն. 1984, հ. Բ, ՀՍՍՀ ԳԱ հրատ., 687 էջ:

Հովհաննիսյան Ա. 1957, Դրվագներ հայ ազատագրական մտքի պատմության, հ. Ա, ՀՍՍՀ ԳԱ հրատ., Երևան, 524 էջ:

Հովսեփյան Գ. 1913, Քարտեզ հայ հնագրության, «Շողակաթ», Վաղարշապատ, 218 էջ:

Մանանդյան Հ. 1978, Երկեր, հ. Բ, Երևան, ՀՍՍՀ ԳԱ հրատ., 646 էջ:

Մարկուարտ Յ. 1912, Վրական Բագրատունեաց ծագումը.– «Հանդէս ամսօրեայ» (Վիեննա), թիւ 6, էջ 333–340, 1913, թիւ 5, էջ 281–293, թիւ 8, էջ 463–475:

Մելիք-Բախշյան Ստ. 1968, Հայաստանը VII–IX դարերում, Երևան, «Միտք» հրատ., 424 էջ:

Մխիթարայ Այրիվանեցւոյ Պատմութիւն հայոց. 1860, Մ. Էմին, Մոսկվա, Լազարեան Ճեմարանի տպ., 69 էջ:

Մովսէս Կաղանկատուացի. 1983, Պատմութիւն Աղուանից աշխարհի, Երևան, ՀՍՍՀ ԳԱ հրատ., 383 էջ:

Յակուբի. 2005, Պատմություն (Տարիխ), Երևան, ԵՊՀ հրատ., 703 էջ:

Յայսմաուրք. 1706, Կ. Պոլիս, Գրիգոր դարի տպ., Արացի Ժե, Յունվարի իբ:

Յովհաննէս Դրասխանակերտցի. 2010, Պատմութիւն հայոց, Մատենադիրք հայոց, ԺԱ հատոր, Ժ դար, Պատմագրություն, Գիրք Ա, Անթիլիաս–Լիբանան, ԵՊՀ հրատ., 795 էջ:

Յովսէփեանց Գ. 1931, Մխիթար Այրիվանեցի, նորագիտ արձանագրութիւն եւ երկեր, Երուսաղէմ, 23 էջ:

Նալբանդյան Հ. 1956, Արաբացի ոստիկանները Հայաստանում. – ՀՍՍՌ ԳԱ «Տեղեկագիր» հաս. գիտ., № 8, էջ 105–124:

Չամչյան Մ. 1984, Հայոց պատմություն, հ. Բ, Երևան, ԵՊՀ հրատ., 1060 էջ:

Ռենու Շ. 2008, Հայոց ծիսական տարվա զարգացումը VIII–XII դարերում ծիսական մեկնությունների և գրքերի հենքի վրա. – ՊԲՀ, № 3, էջ 77–102:

Սամուէլ Անեցի եւ շարունակողներ. 2014, Ժամանակագրություն, աշխատ. Կ. Մաթևոսյանի, Երևան, «Նաիրի» հրատ., 502 էջ:

Ստեփաննոսի Սինեաց Եպիսկոպոսի Պատմություն Տանն Սիսական. 1861, ի լոյս ընծայեաց Մկրտիչ Էմին, Մոսկվա, 386 էջ:

Ստեփանոս Տարաւնեցի Ասողիկ. 2010, Պատմութիւն Տիեզերական. – «Մատենագիրք հայոց», հ. ԺԵ, Ժ դար, Պատմագրութիւն, գիրք Բ, Անթիլիաս–Լիբանան, ԵՊՀ հրատ., 893 էջ:

Տեր-Ղևոնդյան Ա. 1977, Արմինիայի ոստիկանների ժամանակագրությունը. – ՊԲՀ, № 1, էջ 117–128:

Օրմանեան Մ. 2001, Ազգապատում, հ. Ա, Էջմիածին, Մայր Աթոռ, 1870 էջ:

Ֆասմէր Ռ. 1929, Ժամանակագրութիւն Հայաստանի ոստիկաններու Ալ-Ամին եւ Ալ-Մամուն խալիֆների օրոք. – «Հանդէս ամսօրեայ» (Վիեննա), թիւ 10–11, էջ 650–667:

Гиргас В. 1865, Права христиан на Востоке по мусульманским законам. СПб., В печатне В. Головина, 116 с.

Марр Н. 1905, Аркаун, монгольское название армян в связи с вопросом об армянах-халкедонитах. – «Византийский временник», 68 с.

Тер-Гевондян А. 1977, Армения и Арабский халифат. Ереван, Изд. АН Арм ССР, 320 с.

Юзбашян К. 1988, Армянские государства эпохи Багратидов и Византия IX–XI вв. М., «Наука», 300 с.

Tritton A. S., 1970, The Caliphs and their Non-Muslim Subjects. London, 1970, 240 p.

ЦЕРКОВЬ В ПЕРИОД ВОССТАНОВЛЕНИЯ ВНУТРЕННЕЙ АВТОНОМИИ АРМЕНИИ (Первая половина IX века)

ВАРДАН АЛЕКСАНИЯ

Р е з ю м е

Ключевые слова: Армянская церковь, арабские правители, монастырь, религиозные гонения, Баграт Багратуни, Давид II Какахеци, Ованнес IV Оваеци, Мутаваккил, вероотступничество, восстание, тондракийское движение, мученичество.

В VIII–IX веках феодальное землевладение, составляющее экономическую основу Армянской церкви, претерпевает структурные изменения. Вновь строящиеся монастыри формируют свою инфраструктуру, приобретают большие участки земли. В условиях межконфессиональных споров и нападков со стороны ислама церковь укрепляет свои теоретические основы и создает собственное законодательство. Четкое определение ритуально-религиозных и богословских принципов Армянской церкви способствует развитию осознания национальной и религиозной идентичности.

Продолжающиеся религиозные гонения на христиан достигают апогея в середине IX века при халифе Мутаваккиле. Параллельно с конфискацией имущества и драгоценностей армянской церкви первостепенным становится изменение вероисповедания армян.

В первой половине IX века в Армении происходят серьезные церковно-религиозные процессы. Прибытием в Армению одного из авторитетных представителей ассирийской церкви – дьякона Наны – предпринималась попытка создать Союз армянских и сирийских церквей.

Во время правления католикоса Давида II Какахеци нелегкий процесс восстановления автономии Армении сопровождается восстаниями местных правителей, не признающих верховенство халифатской власти. Параллельно с религиозными гонениями арабов активизируются посягательства халкидонитцев на последователей Армянской церкви.

Католикос Ованес IV Оваеци был избран без согласия Великого князя армян Багарата Багратуни. Свергнутый, затем восстановленный Католикос со строгой последовательностью старался предотвратить вероотступничество армянских князей, требовал следовать христианским заветам. В период его правления уже наметилась перспектива распада арабского господства. В середине IX века армянские князья распространяют свою власть на подавляющую часть территории страны и восстанавливают автономию.

Вардан Алексанян – к. и. н., доцент, преподаватель кафедры истории Армении и обществоведения Иджеванского филиала ЕГУ. Научные интересы: история Армянской церкви в период феодализма. Автор 3 учебно-методических пособий и около 20 статей. vardanalexanyan406@gmail.com

ARMENIAN CHURCH IN THE PERIOD OF RESTORATION OF THE INTERNAL AUTONOMY OF ARMENIA (First half of the 9th century)

VARDAN ALEXANYAN

Summary

Key words: Armenian church, Arab rulers, monastery, religious persecution, Bagarat Bagratuni, David II Kakaghetsi, Hovhannes IV Ovaetsi, Mutavaqqil, apostasy, rebellion, Tondrakian movement, martyrdom.

In the VIII-IX centuries, feudal landownership, which constituted the economic basis of the Armenian Church, underwent structural changes. Newly built monasteries form their infrastructure and acquire large plots of land. In the context of interfaith disputes and attacks from Islam, the church strengthens its theoretical foundations and creates its own legislation. A clear definition of the ritual-religious and theological principles of the Armenian Church contributes to the development of awareness of national and religious identity.

The ongoing religious persecution of Christians culminates in the middle of the 9th century under Caliph Mutawakkil. In parallel with confiscation of the

property and jewelry of the Armenian Church, the change of religious confession of Armenians becomes paramount.

In the first half of the 9th century, serious ecclesiastical and religious processes took place in Armenia. With the arrival in Armenia of one of the authoritative representatives of the Assyrian church, deacon Nana, an attempt was made to create a Union of Armenian and Syrian churches.

During the reign of Catholicos Davide II Kakahetsi, the difficult process of restoring the autonomy of Armenia is accompanied by uprisings of local rulers who do not recognize the supremacy of the caliphate power. In parallel with the religious persecution of Arabs, encroachments of the Chalcedonites on the followers of the Armenian Church are intensifying.

Catholicos Hovhannes IV Ovaetsi was elected without the consent of the Grand Duke of Armenians Bagarat Bagratuni. The overthrown and then restored Catholicos tried to prevent the apostasy of the Armenian princes with strict consistency and demanded to follow Christian precepts. During his reign, the prospect of the collapse of Arab domination was already outlined. In the middle of the 9th century, the Armenian princes extended their power over the vast majority of the country's territory and restored autonomy.

Vardan Alexanyan – Candidate of Historical Sciences, Associate Professor, Lecturer at the Department of Armenian History and Social Science, Branch of YSU in Ijevan. Scientific interests: History of the Armenian Church in the Middle Ages. Author of 3 educational-methodical manuals and about 20 scientific articles. vardanalexanyan406@gmail.com